

տարապետութեան մէջ, իր էութեանը խորհուրդը ալիքների վրայ թառած ճառագայթների մօտ: Չուսպ ալք մարդի մէջ հերոսական ի՞նչ ոգի, մարտիրոսացման ի՞նչ տենչ:

Վերջին անգամ ես նրան տեսայ Պերայի մի տան մէջ, ինչ որ նոր պաշտամունքի սրահում: Երկար նստարանների վրայ, նստած էին խոնարհ մարդիկ եւ կանայք, ոտաբորիկ: Գարշելի հոտ էր գալիս: Չրաքեանը լուանում էր նրանց ոտքերը: Ընդառաջ եկաւ ինձ ուրախացած, աչքերի մէջ հաւատաւորի փայլով:

«Իսկ ձեր արուեստը», — հարցրի:

«Մի ըսէք ձեր արուեստը, ըսէք ձեր հոգի՛ն», — ուժգնօրէն շեշտեց նա:

Յուզուած վայր իջայ, խոստանալով վերադառնալ: Դրան մօտ հանդիպեցի Պերայի լրագրողներից մէկին:

«Աղբար, — ասաց — սա մարդը նախ խենդ է եւ երկրորդն ալ ծախուած է ամերիկացիներուն: Մտիկ մի ըներ, խորամանկին մէկն է, որ իր գործը շատ լաւ գիտէ»:

Եւ այդպէս սինլեթոր ամբողջ գրական խութանը:

Մի ամիս յետոյ Չրաքեանը, գիտնալով այն վտանգը, որ նրան սպասում էր, մեկնեց եւ մարտիրոսացաւ:

Ու խութանի բերնի վրայ քմծիծաղը սասուեց: * * *

Եղիա Տէմիրճիպաշեանը եւ Չրաքեանը, իրենց հերոսական կեանքով եւ մահով, շատ բան ներելի պիտի դարձնեն հայ կեանքին եւ մանաւանդ պոլսահայ կեանքին: Նրանք աւամայ մարտիրոսներ չեն ու եթէ զոհ են՝ զոհ են հայ իրականութեան մէջ տիրող թշուառութեան: Եթէ հայ ժողովուրդը ողբերգութիւնների ենթարկուած է, հայ անհատը ողբերգական եղած է: Տարօրինակօրէն նա զուրկ է ներքին դրամայից, տուայտանքից եւ որոնումից: Մեր գրականութեան մէջ բոլոր հերոսները կապուած են մանաւանդ առաքիլայական աշխարհի հետ, ենթակայ են նրան, կուռւմ են զազափարի համար, որ ընդունած են դրսից, գրադուած են թաղական, վարչական, դպրոցական, ընկերային եւ ազգային կեանքով:

Հայ մարդը համամարդկային եւ համաշխարհային է, մշակոյթը նա ընդունում է որպէս ընդհանուր սկզբունքների արտաքին քա-

ղաքակրթական ձեւ եւ հասարակական անհրաժեշտութիւն:

Թերթ, թատրոն, դպրոց... Բովանդակութեան հարցը երկրորդական է, կարեւորը ինքը հիմնարկութիւնն է:

Վախում եմ ասել, բայց այսպէս չի՞ եղել միթէ նաեւ հայ եկեղեցու հետ:

* * *

Սկիւտարն էլ ունի իր հիմնարկութիւնները: Մեծ տենչ դէպի քաղաքակրթական ամէն տեսակ ձեւեր: Լսարան, թաղական դպրոցներ, ընթերցարան... Թէփէի թատրոնը: Բէյլէրի պարտէզը:

Պերայից երբեմն դերասանների խումբ է գալիս, ներկայացումներ սարքում: Ժողովուրդը լեցնում է փայտէ նստարանները, մեծ ուշադրութեամբ լսում մի ոմն «Կորրադոյի» ոտնոցը, կամ, երեսուն տարի առաջ Ֆրանսայում խաղացուած «քրքլալից» մի դաւեշտ:

Թատրոն են գնում հայրենասիրաբար, այնպէս, ազգին ծառայելու համար:

Տօն օրերին Բէյլէրի պարտէզում թաւու են խաղում, օղի խմում եւ յետոյ, կուսակցութիւնների բաժանում եւ ժողովների գնում:

Լաւ է, որ Սկիւտարը մի քիչ գիւղ է եւ մի քիչ Հայաստան: Հայաստան... ոչ ոք այստեղ Հայաստանը չի տեսել, եւ ամէն մարդ իր մըտքի մէջ կառուցում է նրան ըստ իր երեւակայութեան:

Երեկոները, երբ վերջալոյսը բլուրների կատարին կրակ է մաղում, անցորդները դանդաղեցնում են իրենց քայլերը, գլուխները ծրուում դէպի հողը, գիշերային խորհրդին սպասում:

Երիտասարդները՝ տների չէմին առջեւ խումբ խումբ ժողովուրդ են եւ փախստականների բերած երգերն են երգում:

Երեւան բազ եմ առել...

Ոմանք կանգ են առնում Վոսֆորի առջեւ եւ երկարօրէն մտածում են: Ու մինչ եկեղեցու զանգակները հեռունեն են թեւարկում, իմ հարեւաններից մէկը լարում է իր անխուսափելի դրամօֆօնը...

* * *

Ես ունեմ բազմաթիւ բարեկամուհիներ:

Ոմանց մօտենում եմ հետաքրքրութեամբ՝ միշտ նոյն աթէնդալեան խաղը կրկնելու հա-